

Poli'a Kolosi Vahe'mokizmi Avonkrezmi'nea Naneke

1 ¹Nagra Poli'na, Anumzamo Agra'a avesizante Jisas Kraisi aposol manio hu'nemo'nane, Timoti nerafu'ene ama avona kreneramu'e. ²Kolosi kumate'ma Anumzamofona nagama, ke amage'antetma fatgo hutma Kraisimpima nemniza tafuhe'motarega, Anumza Nafatimofontegati asunku'zane, rimpa fruzamo'a tamagritega vie.

Poli'a Anumzamofona susu hunenteno nunamu huzmante'nea naneke

³Tagrama maka knama tamagriku'ma nunamu hunermanteta, Rantimofona Jisas Kraisi Nefa Anumzamofona susu hunento'e. ⁴Na'ankure tamagrama Jisas Kraisinte'ma tamentintima nehutma, Anumzamofona nagaku'ma tamavesi nezmantaza zamofona tamagenke nentahuna zanku hu'none. ⁵Tagrama tamage knare musenke nentahita, fore'ma hanigeta kesune huta avegama ante'naza zamofompinti, amentinti hu'zane, avesinte'zana monafi anteramantegno me'ne. ⁶Ana knare musenkemo'a tamagrite e'neankino, miko kokankoka ama ana knare musenkemo'a hageno raga'a renente. Tamagrama ese knazupa ana knare musenkema nentahitma, Anumzamofona asunkuzana tamage hutma antahi ama hu'naze. ⁷Tamagra ko Epafra tagrane magoka kazokzo eriza eneruna nerafu rempi huramimigeta antahi'naze. Tamagriku huno tagrira tazahanigu Kraisi eriza enerino, ⁸rumokizmigu zmavesintezama Ruotage Avamumo neramamia zanku agra eme nerasamie.

Poli'a Kolosi vahe'mokizmi Anumzamofona zamaza hanigu nunamu hu'nea naneke

⁹Hanki e'iana agafare, tagrama tamagenkema antahuna knaretima e'neana, tagra tamagrira Anumzamofona Agra'a avesite avamupi knare antahizane, antahi ama hu'zana antevitermantesiegu nunamuna huvava huta antahi'negone. ¹⁰Ana nehutma tamagra hakare'zama hanaza zamo'a, Ramofona avurera knare nehuno, Ramofona raga amisageno, ana miko knare erizantimo'a raga renentenko, Anumzamofona knare antahizampi

hageta mrerigahaze. ¹¹ Agri'a msanetake hankavereti tamazeri hankavetinketa kazikazi huta nevuta, akoheta agazone huta musezampi manigahaze. ¹² Tamazeri knarema hanigetma Anumzamofa nagamo'za erisintiharegahaze hu'nea masanentake kumakura, Nafatimofona miko zupa susu hunentone.

¹³ Na'ankure hanizamfo hanavefintira taza huno tavreno avesinentea Ne' Mofavre'amofa kumapi nerante. ¹⁴ Agrama kefozampinti mizaseranteno, kumitima apaserante nemofompi nerante.

Poli'a Kraisinku Ra manine hu'nea naneke

¹⁵ Kraisi'a onkenona Anumzamofa amema'agino, ana miko'zama Anumzamoma tro hunte'nea zantamimofona Agra e'se mofavre mani'ne. ¹⁶ Na'ankure Agrake'za anamiko zana tro huntene, monafima me'nea zantamima, mopafima me'nea zantamima, negona zantamima, nonkona zantamima, kini vahe traro, ruzahu ruzahu kumaro, kegvahu vahero ruzahu hankavea, Agrake tro hunte'neakino Agri zantami me'ne. ¹⁷ Agra ana miko'zamo'a fore osu'negeno mani'neakino, ana mikozana Agrake'za azeri manumanu hu'ne. ¹⁸ Kraisi'a Agranena mono kevu nagamofa aseni'a manine. Fri'naza vahepintira Agra esera fripintira oti'negu, anamiko zampina Agrake aseni'a mani'ne. ¹⁹ Na'ankure Nemofompima Anumzamoma Agra'a manivitesigu musena nehie. ²⁰ Keka zafare tagiramine koranteti, monafine mopafina rimpa fruzana avrenteno, Kraisimpi ana mikozana Anumzamoma emeri hagerafino, erimago huno Agreaga avrentene.

²¹ Korapara tamagrama kefo tamavutmavama nehuta, antahintahi tamifina Anumzamofa ha' vahema manineta afete mani'nazane. ²² Hianagi menina Kraisi'a ama avufgare eme frino, tamazeri mago huno Anumzamofa avurera tamazeri ruotge hu'neakino, magomoma kea huoramantege, hazenke vahere huoramantesigetma, havigema huramante zampintira fru hutma manigahaze. ²³ Hianagi tamage kegura tamamentinti huvava nehutma, anankere oti hanavetiho. Fore hanigeta kesnaza zanku'ma knare musenkefinti antahi'naza zana otreho. Ana knare musenke miko ama mopafi zantaminte huama hu'nazankita ko antahinaze. Nagra Polina e'i anankemofa eri'za vahe mani'noe.

²⁴ Tamagriku'ma hu'na natama e'neruazankura nagra muse nehue. Na'ankure Kraisi'ma atama erimete'nea zamo'a ama navufarera natazana erivinetanki, mono kevumotma, Kraisi avufga mani'naze. ²⁵ Nagrama vahetema kegvahu eri'za vahe'ama mani'noana, tamagrama tamaza huzama erisagu hunantege'na, ana miko Anumzamofa nanekea huama nehue. ²⁶ Ama ana nanekea oku'a ante frakino koma maniza e'naza vahepine, ana knafine anteneane. Hianagi menina Anumzamofa nagatera eri ante'ama nehie. ²⁷ Anumzamoma Agra'a avesite oku'a me'nea kea taveri

hu'ne. Ama ana kea knare hu'neankino, maka vahemokizmi zamaza hugahie. Ama ana kea Kraisi agra tamagrane mani'neakino tamavreno vanigetma so'ezana kuma'afinti ome erigahaze. ²⁸Hu'negu miko kaziga vunana Kraisinkura, Anumzamo'ma tami'nea knare antahintahireti kegvahiho nanekea nezmasamita rempia hunezamune. Na'ankure Anumzamofontera fatgo hu'za Kraisi'ene tragote'za manisazegu anara nehu'ne. ²⁹E'ina hu'negu Kraisima maka hankavema naminereti tusi hankavetina eri'zana e'nerue.

Kasefa nomanizamofu naneke

2 ¹Tamagri ene mago'a Leodisiana nemaniza mono nagamo'zane, mago'amozanema nagri'ma nage'za antahiza osu'namokizmi zamaza hu'naku maragu'zama netuazana antahi ama hnazegu nehue. ²Nagrama eri'zama e'neruazamofu agafa, zamagu'a zamazeri hankavenetisuge'za zmavesizampina erimago nehu'za, knare antahizampina avinetezma, Anumzamofu oku fraki'nea zama'a antahi ama hanazana, e'i Kraisi'e. ³E'i Agripi miko knare antahintahizamo'ene, miko antahizana frakino, zgo nomp me'neakna huno me'ne. ⁴Ama kema neramasamuana mago'mo atrenkeno knare masevenke'afinti reramatga osino. ⁵Na'ankure ama navufgarera tamagri'enenana omani'noanagi, avamupina tamagrane mani'noankina tamagrama mani fatgo nehutma Kraisinte'ma hankave tamentinti nehazazama kenugura muse nehue.

Kraisi ene tragoteta kasefa tasimu erisuna naneke

⁶Hanki e'ina hu'negu Kraisi Jisasina, Rane hunka ko avrenananki, Agra'ene magoka vano huo. ⁷Tamagra Agrite zafamo arafu'nareno oti hanavetiankana nehutma, nomo hanave zafare oti hanavetiaza hutma onetitma, knare musenkera oti hanave netitma, maka knafina Anumzamofona susu hunteho.

⁸Kva hunetma zamatrenke'za agafa'a omane antahintahi zantetira tamazeri neginagi osiho. Keaga zamimo'a knare'za hugahianagi, zamagra ama mopafi avamumofu hanavefinti e'neaza rempi huneramizanki, Kraisintegati enea'zana rempi hunoramize. ⁹Na'ankure Kraisi'a tagrikna huno ama avufgare mani'negeno, Anumzamofu avu'avamo'a mika Agripi avitene. ¹⁰Hagi Kraisi'a ana miko hankavene, ana miko asenia mani'nemofu avu'avara tamagripi anamiko fore hanie huno tamami'ne. ¹¹Tamagra kumi tamavutamaza atrazazamo Kraisimpina oku tamavufga taga hu'naze. E'i vahe'mo azantetira ana tamavufga taga osu'neanki, Kraisima eri'nea eri'zamo anara huramantene. ¹²Mono tima frazana Agri'ene frizageno aseramantegeta tamentintima hzageno'a, Anumzamoma Kraisima fripinti azeri otinemofo hankavemo, magoka Kraisi'ene tamazeri otine. ¹³Tamagrama kumipi frinetma, kumira

otrenageno, Anumzamo'a Kraisi'ene magoka tamazeri kasefa nehuno, mika kefozantamia eri atreramante'ne. ¹⁴Mosese kasegemoma keagama huneranteazana Anumzamo'a tagritetira eritreno Kraisi keka zafare hantine. ¹⁵Hankave avamutamimofu hankavene hankave zantamimofu hankavea keka zafare erinetreno, Anumzamo'a miko vahe zamaveri amate huno, ana mikozamofu hankavea Kraisi'a keka zafare eri netreno zmazeri haviza huno zmazeri amnezankna hutre'ne.

¹⁶Hanki atrenkeno vahe'mo'a ne'za nezantero, ti nezantero, kasefa ikante ne'za retro huno nezantero, mono atru huknarero, manifruhu knagura refako huormanteho. ¹⁷Ama anazantamina henkama esia zantamimofu amema'e. Hu'neanagi Kraisi'a tamageza mni'ne. ¹⁸Mago'mo'ma avanama kenesia zankuma huno, tamagra anteramita ankeromofu mono huntaho hanigetma, tamagra atrenkeno tamagrira tamazeri fenka otreno. E'inahu vahe'mo'za korapa zamarimpampfu avu'ava nevaririza, zamagrama antahizana zmagra'ake knare antahizana eri'none hu'za zmauvu'ga ra nehaze. ¹⁹Hianagi Kraisi'ma asenima mni'nea avufgamofonte zamagra rekanuhe'za omani'naze. Na'ankure Kraisi'ma asenima mni'nea avufgamofona hanavea nemino, agruna nofi'mo zaferinafi hagenarfigeno kora nofi'mo vuno eno higeno, Anumzamofu hanavere nehage.

²⁰Tamagra Kraisi'ene frizageno, Agra ama mopafi havi Avamumofu hankavefintira kazufe tamantegetma fru hutma mani'nazagu, nahigetma ama mopafi tra keramintera amagera antevava nehaze. ²¹Ana tra kemo'a huno azeri avako osutma, neta onketma, avakora osiho hu'ne! ²²E'inahu tra kea mopafi vahe'mo rempi huneramiankino, ana tra kema amagama nentaza zamo'a amnezankna hugahie. ²³Ana tra kema avaririsamo'za knare'za nehune hu'za hugahaze. Zamagra tamagritema eama hanazana, Anumzamofoma mago'ane avesintezama, anteramino manizama, avufgamofu avesizama kegva hazankna hugahaze. Hianagi zamagra taza huza korapa tamavesizana eri atregara osugahaze.

Kasefa huta manisunazamofu naneke

3 ¹Kagrira Kraisi'ene fripinti Anumzamo'a kazeri otinegu, kagu'a monafinka me'nea zantaminte anto, Kraisi'ma Anumzamofu azantamaga kazigama mani'nere. ²Monare zanku tamagesa areare nehuta, mopafi zankura tamagesa arerera osiho. ³Tamagra frizageno, tamasimumo'a Kraisi ene frakino Anumzamofompi me'ne. ⁴Kraisi'a tagri tasimu maninemo eama hania zupa, tagranena Kraisi'ene hanavenetake masazama'afi e'ama hugahane.

⁵Tamagripima ama mopafi kefo tamavutamava me'nesiana ahefriho. Ana avu'avara monko avu'avazama, agru osu avu'avazama, rumofu zantema kenunu hu'zama, havi agu'agesa antahizama, agraguke antahi

avu'avazama, e'inahu avu'avazamo'a havi anumzante mono hunteakna hu'neanki atreho. ⁶Na'ankure e'inahu avu'avama nehaza vahete Anumzamofu rimpahozamo'a egahie. ⁷Tamagra korapara anahukna kante vono nehutma, ana avu'avazampi mani'nazane. ⁸Hianagi menina mika havi avu'avazana eritreho, havi asivazi'zama rimpah'e'zama, havizama rumokizmi huzmante'zama, urinkema hu'zana atreho. ⁹Korapa tamavufgamofu havi avu'avazana ko atrenzanki, orevatga arevatga osiho. ¹⁰Hagi menina magoke magoke'motma kasefa vahe nemanitma, troma huramante'nea nekna maka kna nehutma, mago'ene agrira antahi ama hugahaze. ¹¹Amafina Griki vahera omanigeno Jiu vahera omanigeno, avufga tga hu'nea vahero, avufga taga osu vahero, Sintiene vahero, Barberien vahero, kazokzo eri'za vahero, kina osu vahero, Kraisi'a ana miko'za mani'neankino, Kraisi mikamotafina mani'ne.

¹²E'ina hu'negu Anumzamoma huhampri ramantegeta ruotge hazageno'a, Agra tusiza huno avesiramantenege, tamagra rumokizmia tamasunku huzmanteta zmazeri so'e nehutma, vahe'mofu knare tamavu'tamava hunezmanteta, anteramita nemanita, agazone tamavutamava nehuta, akoheno avega anteno mani tamavutmavara kukena hiaza hiho. ¹³Mago'moma havizama hugantenesigenka ana knazana e'nerinka, Ramo'ma kumika'a atreganteneaza hunka ana havizama hugantenesimofona, havizama'a atrento. ¹⁴Avesimantezamo ana miko avu'avara agaterenege, rumokizmi zamavesizamanteho. Avesi'ante avu'avazamo ana miko knare avu'avazana azeri manumanu hu'ne. ¹⁵Kraisi rimpa fruzana atrenkeno tamagu'afina kegva hurmanteno, na'ankure tamarimpa fru huta manisazegu kehigetma mago avufga mani'nazanki, miko zupa Anumzamofona susu hunteho.

¹⁶Atrenkeno Kraisi nanekemo'a tamagu'afina meviteneana, miko knare antahintahireti rempi hunezamita zmazeri fatgo nehutma, Anumzamofu avontafepi zgamera nehutma, krente zgamera nehutma, mono zgamera hutma Anumzamofona tamagu'areti susu huntegahaze. ¹⁷Kegaga hanampino, eri'za erisampina, Rantimofu Jisasi agifi makazana huo. Jisasimpi Anumza Nafatimofona susu huntegahune.

Mono nagamofu naneke

¹⁸A'netmotma neramave agorga'a anteramitma maniho, e'inama hanazana Ramofu avurera knare hu'ne. ¹⁹Venenemota a'netamimofona zmavesinezamanteta, tamarimpa haviza huozmanteho. ²⁰Mofavre'mota mika zupa neramarera tamafa ke amage anteho, na'ankure Ramo'a muse hugahie. ²¹Zamafaheta mofavre nagamokizmia zamarimpa knama erizamizana osiho, ru zamagra knarera osu'none hu'za antahigahaze.

²²Kazokzo eri'za vahe'motma maka'zama hanafina ama mopare kva vahe'mofu agorga'a mani'netma hakare'a zama hanafina kva vahe tamimo

tamavesi tamantesia kazigati, zamavureke eri'zana e'oriho. Hianagi Ranka'amofu ra agi nemitma, tamagu'areti hutma kva tamimofu erizana eriho. ²³Ana miko erizama erisanana, kagu'areti hunka Ramofu eri'za e'nerinanki erio. Ama mopafi kva vahekamofu eri'zankera e'norine. ²⁴Kagra Ramofontegatima musezana erisintiharegahane hu'nea zana erisana zankura ko antahinane. E'i Ramofu Kraisi erizama enerinane. ²⁵Hianagi iza'o hazenkema hanimofona, Anumzamo'a hazenkema hanirera nona'a huntegahie, hagi magomofonkuke hu Anumzana omani'ne.

4 ¹Kva vahe'mota, kazokzo eri'za vahetamia fatgo huno knarema hu'nesia tamavutamava hunezmanteta magomofonkukera osiho, na'ankure tamagra antahi'naze, tamagri'enena mago Kva vahetamia monafinka mani'ne.

Nunamu huzanku zamazeri hankaveti naneke

²Nunamura hu'zana azeri hankavetineta, kava huta mani'neta Anumzamofoma susuhunte avu'avazana otreho. ³Hagi tagri'enena nunamu hunerantenkeno, Anumzamo'a kana erifore hina nanekema hanunazamo'a, vuno eno hanigeta, Kraisi naneke'ama oku me'nea kea erinteamo hamneno. Na'ankure nagrira ana nanekema huama huazanteku kina hunante'naze. ⁴Nunamu nehinkenno nanekema huama hanua nanekemo'a, ama hino.

⁵Zamentinti osu vahema maninesafina, kakamura fore hanigetma hakarezama hanazana kva hunetma, ama antahintahi zanteti knare tamavutmava huzamaveri hiho. ⁶Maka zupa vahe'mofoma zmazeri so'ehu nanekege nehinke'za, zamagrama antahisazana, ketamimo'a knare huno haga hino. Tamantahige nanekema hanazana, trohuneta knare hutma kenona huzamanteho.

Poli'a huvgare naneke'a hu'nea naneke

⁷Tikikusina, tusi'za hu'na navesinentoa nenafukino, vahe kegvalu eri'zana agu'areti tamage huno e'nerino, nagrane magoka Ramofonte kazokzo eri'za eneru'a nekino, ana miko nagri nagenkea eme tamasamigahie. ⁸Nagra ama agafare huntogeno tamagritega e'ne. Nankna huta tagra amafina eri'zana e'nerune, anazamofu naneke eme neramasamino tamagu'a tamazeri hankavetigahie. ⁹Nagra huntogeno Onesimusi'a tikikusi ene e-e. Agra tamagripinti magotamimokino, tamage huno agu'areti eri'zana enerigeta tavesinentona nerafukino, agra Tikikusi'ene esu'ne ana miko'zama tagrite'ma fore'ma nehiazamofu agenkea eme tamasamigaha'e.

¹⁰Aristakusi'a nagrane kina huta kina nompri manino'a ne'mo musenke atreneramantegenno, anazanke huno Banabasina nefu, Maki'a musenke

hurasante. Ko'ma agri agenkea tamasmino nekino, tamagritega esigetma muse hutma avreho. ¹¹Hagi Jisasi'e hu'za nehaza ne'mofo mago agi'a Jastusikino, agranena musenke atreramante. Zamuvufga tgahu Jiu vahepinti e'inama'amo'za naganena magoka Anumzamofokumakura eri'zana eneri'za knare hu'za nazeri hanaveneti'za nagare. ¹²Epafrasi'a Kraiz Jisasi kazokzo eri'za ne' tamagri kumateti nekino, musenke atreramante. Agra tamagrikura tusi'za huno, Anumzamo'ma avesinea kante tamaza hanigeta oti hanavenetita, nena vahekna nehutma ana mikomotma hakare zampina ama hnazegu nunamuna maka zupa huneramante nere. ¹³Nagra agrikura huama hu'na tamasamiza hue, agra tusiza huno tamagriku'ene Laodisia kumate'ene mono nagamotane, Hierapolisi mono nagamotagura tusi'za huno aghesa antahineramia nere. ¹⁴Nerafu tusa ne' Luku ene Demasikea musenke atreramantaze.

¹⁵Nagri musenkea Laodisia kumate mani'naza mono naga'ene Nimfa'ema nehaza a'ene noma'afima atruma hu'za monoma nehaza nagara ome zmasamiho. ¹⁶Tamagrama ama ana avoma hampri vgamaretasuta, Laodisia mono nagara zaminke'za zamaganena hamprisageta, tamaganena zamagri avona hampriho. ¹⁷Hagi Arkipasina asamiho, Anumzamo'ma kami'nea eri'zana kva hu'nenka erivgaro hutama asamiho.

¹⁸Poli'na nigrani'a nazampinti ama musenkea kreramue. Kinafima mani'noa zankura tamagera kanionanteho. Anumzamofokumakura eri'zana kva hu'nenka erivgaro hutama asamiho.